

四庫全書

史部

欽定四庫全書

赤城志卷三十八

宋 陳耆卿 撰

冢墓門

生而敬其人死而護其兆此賢人君子之所以能為世  
勸也余觀州之冢墓自三國以來抑何其寥寥乎其埋  
沒者已不存而其存者或不守翁仲子立雨披煙殘欲  
遐想遺風而長夜不可旦矣然自今考之亦有出於遺  
民故老之流傳而未訂其實者如徐梁三王之類是耶

非耶今既不能知其非則不容不襲之以為是至於近世貴盛踵相躡則有不可備記者今斷自法從云

臨海

吳陳尚書化墓在縣東一百三十里舊有碑隋末海寇仆之

陳使君熙墓在縣東南一百二十三里白楓山北

晉李使君成墓在縣東南一百二十五里白楓山南

任隱君旭墓在縣東九十里東刊山南前有石麟又

有几女冢乃其女弟之墓

樊府君墓在縣東南七里樊續與按太平御覽云舊有空冢猶餘敗鼓角焉

元相國墓在縣東一十五里舊傳唐元稹之後嘗為州通判而死葬於此按今城東有元其姓者居之藏其祖拜相麻乃白居易行詞并書後有守取以遺秦熹此其為稹後無疑但稱相國者訛也

張中大康墓在縣東一百一十里五峴山下

吳王墓在縣西一十四里失其名不知為何王也

韓天冢在縣西二十里鯉魚塢四山環合陰陽家謂得

子午卯酉之正上無林木石少土堅或云昔之僊

人有韓其姓者尸解於此今章安湖側黃巖茶寮

山亦各有之

或云韓墓今不存舊有于其姓者葬於此

呂丞相頤浩墓在縣西北三十里褒忠顯績院左

呂甕時陳

侍郎公輔營其柩於海上至一富姓家符之發其蓋有朱書呂安浩三字即主者姓名可怪也

范丞相宗尹墓在縣東四十五里報恩衍慶院側

陳侍郎公輔墓在縣南三十里拗嶺

晁金紫公為墓在縣東南一百二十里金溪晁嘗為州

後葬此

曹開府勛墓在縣西四十里顯恩褒親院側

王參政之望墓在縣南二十里定業院側

綦內翰室禮墓在城南一十里東山

李尚書擢墓在縣南一十九里寶嚴院西子吏侍並謙

墓附焉

盧侍制知原墓在縣東一百二十里柑桐

盧本山東人嘗夢有告者

云生山東死柑

桐後果葬焉

姜寶學誥墓在縣東四十五里西溪

陳詹事良翰墓在縣南五里真空院右

謝叅政廓然墓在縣南二十里楊梅山

謝丞相深甫墓在縣西北六十里保寧院側

商侍郎飛卿墓在縣西二十五里龍潭莊側

應諫議武墓在縣東北四十五里靈鷲院側

黃巖

天冢在茶寮山南世傳有人鋤山得物狀如鐵窻呼其  
黨劊之見金棺熠熠有光忽雷雨暴至勢若摧山  
裂石衆驚走及再往則有道士莪冠簪立於雲靄  
間明日詣之岌然石也於是相與駭異復封植之  
號云天冢

徐偃王墓在縣東南二十五里勝果院後山有土甃臺  
址及石筍尚存按韓愈衢州廟記云王北走彭城



百姓從之王死號其山為徐山鑿石為室以祠之  
則是其墓當在彭城矣又云或謂王之逃戰不之  
彭城之越城之隅棄玉几研於會稽之水則是其  
逃未有定止況其墓哉今象山雪川等處皆有偃  
王墓以一人而墓至三四誠不可攷然黃巖故會  
稽也今並墓之山亦名徐山與韓愈說合徐山南  
一十五里有偃王古城其敢臆斷以為非耶

晉王氏墓在縣南七十里樓崎山墓執螭形魚文貫以

柳或為錢狀旁有文云晉永和十二年歲次丙辰  
八月壬午瑯琊國或云八月壬午作方壁二千樓  
崎洽典作或云太元十五年餘皆漫不可識

許靈感王墓在縣東五里

唐李司直公亮墓在縣南一十五里墓誌乃顏師本撰  
言其先隴西人以開成三年季冬六日旅窆於台  
州黃巖縣南黃山西南之原

陸康業墓在縣東南一百里世傳為宣公贄之後國初

擢進士第倅永嘉而卒葬於此

謝叅政克家墓在縣西五十里教忠崇報寺側

天台

唐豐尚書墓在縣東二里豐家橋近有人穿土得之墓記云尚書五子最幼者名干為僧即豐干也

秦魯國賢穆大長公主祔都尉錢太師景臻墓在縣西北二十里護國寺側少師忱叅政端禮丞相象祖仍祔焉

滕忠烈侯膺墓在縣北七里傳教院側

賀叅政允中墓在縣東四十五里資福院

僊居

唐任相墓在縣北山五里今其溪曰任溪

韓顯謨昭墓在縣南五里管竹村

吳龍學芾墓在縣西一十里申塢

寧海

吳屈尚書晁妻墓在屈母山

梁王墓在縣西北三十里梁王山上嘗於土中得鏡劍  
弩牙焉一云墓不可知但有古杉一根人疑其墓

爾

田將軍墓在縣西一里昔墓圯獲鐵鍔鎧即靖邊侯也

詳見祠  
廟門

李常侍墓在縣北二十五里梅林江南後主之族

鄭都官墓一呼為  
鄭左史在縣南五里大坑昔家於此舊傳有

牛落其鑿燭之棺已成土但見四壁彩畫如新都

官事錢忠懿王與葉尚書以下四人為之納土者  
也今誥勅猶存

葉尚書預墓在縣東北八十里東蒼

葉太傅景泰墓在縣東三十里梅枝

王尚書墓在縣東北五十里瀝洋嶺

張光祿質墓在縣西北五十里硤石

周中大祖墓在縣南五十里東塢其家自越徙此嘉祐

五年忽有天燈見冢上其孫弁登第至元祐二年

復見弁二子煒炳又登第焉

羅提刑適墓在縣西南六十里馬山

洪尚書墓在縣北二十里項塢

赤城志卷三十八

欽定四庫全書

赤城志卷三十九

宋 陳耆卿 撰

紀遺門

宇宙之事無窮簡策之文有既自古傳記豈能物物而  
竟也哉不可竟而欲竟之故有紀遺焉然而歲遠年徂  
日訛月謬遺事之易墜又甚於遺跡之難尋也祥文瑞  
紀識者諱之然桑穀之灾嘉禾之應白魚入舟之異雖  
經傳不廢予得鋤而去之耶故自前代至我朝稍從採



次且以古城郭而下附其後不可竟而欲竟之懼未之  
竟也

遺事

連理木

吳大皇元年郡吏伍曜得於海際枝莖紫色有光

見松陵集

注

又

唐永昌三年五月里人馮義得於海中凡三株一高一

尺五寸連理者九枝一高一尺四寸連理者五十  
枝一高七寸五分連理者七十枝其年郡司馬孟  
詵表進云中有白石扣之聲甚清皮日休送從勉  
游天台詩亦有行過石樹凍無煙之句

註云消山  
有石連理

木消山今  
赤城山也

又

紹興十七年生於天台山闌法寺楓榆共餘三分三合  
其時游客以詩屬曾守宏父有政成不用中和頌

看取春郊連理枝之句曾因作頌以獻於朝

又通判聽

後有連理號鴛鴦木而寧海溪南有櫟木亦然

月桂子

唐垂拱四年三月降於臨海縣境芳香有桂味食之和

暢郡司馬孟詵以聞

見封氏聞見錄及陸龜蒙詩註

五色雲

元和中見於州按柳宗元集為薛中丞浙東奏有云紛紛郁郁自東而徂西若煙非煙一旬而再至乞宣

付史館以昭簡策觀此可見其異矣

瑞米

淳化中出於寧海縣南二十五里地名九頃民應氏田

中其稻生雙米郡以聞

見會要

神鰕

天聖元年州漁人得之海中長三尺餘前二鉗二寸許  
末有紅鬚尺餘首如數升器若繪畫狀雙目十二  
足文如虎豹大率五彩皆具而狀魁梧尤異中使

吳仲華繪其象以聞詔改名神鰕晏元獻公賦其

事

見文  
集

僊鹿

靖康元年寧海縣峽溪忽有之高四尺餘莫知所從來  
遇驅逐則跪而請命中箭死時有黃朝宗者館其  
處夜夢有人持牘相召至一所見老道士白鬚穆  
穆垂其腰云小人無知余養此鹿五百載今為所  
殺聞子獲其麋幸見還視其左扉有司馬子微四

字遂寤時村民既殺鹿有周堯者截其尾以遺朝  
宗後朝宗百餘歲方卒

芝草

紹興三十二年生於天台縣圃凡二本是時臨海亦送  
雙蓮花雙蓮子張守昌作詩有煌煌朱草連年秀  
的的丹渠並蒂香之句

又

紹熙五年二月生於臨海縣獄柱間七葉三層葩采可

愛李龜朋為之記

甘露

乾道四年中秋夜降於州天慶觀聖祖殿前古松上狀如垂旒羽流採食之味甘而香

海鰕

淳熙五年八月出於寧海縣鐵場港乘潮而上形長十餘丈皮黑如牛揚鬚鼓鬣噴水至半空皆成煙霧人疑其龍也潮退閣泥中不能動但睛嗒嗒然視

人兩日死識者呼為海鯀爭舂其肉煎為油以其  
脊骨作臼自是海濱人多患疫焉

遺跡

章安城

在臨海縣東一百一十五里本漢回浦縣屬會稽郡後  
漢光武時改為章安

古城

在黃巖縣南三十五里大唐嶺東外城周十里高僅存



二尺厚四丈內城周五里有洗馬池九曲池故宮  
基址室一十四級城上有高木可數十圍故老云  
卽徐偃王城也城東偏有偃王廟

漢城

在黃巖縣北一十里按舊郡志縣北一十里有莆林郡  
城相傳昔置莆林郡於此然未詳何時亦無經又  
按縣志云昔有二童子戲於山上各立部伍一號  
霸王一號漢王累石為城縱橫里許一日而畢若

有神助焉後漢王死而神降於山鄉人懼而禱之  
遂為立廟二說未詳

孫恩城

在黃巖縣南九十里嶠嶺高四丈許周回六百步永嘉  
記云妖賊孫恩所築按晉書安帝隆安四年賊孫  
恩陷會稽元興元年臨海太守辛景擊斬之

桃都山

按郡國志在台州山上有大桃木木上有天雞日初出

照桃木天雞即鳴天下之雞聞之而鳴木下有兩  
鬼持葦索執不祥之鬼食之

壕頭

在黃巖縣南五里世傳漢兵七十二陣沒於此剷地得  
箭鏃之屬旁有楓木二根大可十數圍葉皆靡地  
舊志云與漢思王冢上木西靡者相類其後傳寫  
愈謬乃於七十二陣上直目曰思王冢按漢書東  
平思王冢在無鹽非台也

鎮亭

在寧海縣西北八十里台明越三界間按西漢地里志  
鄞縣有鎮亭昔晉武帝析鄞置寧海今以地里考  
之尤信

砂碕

在寧海縣北五十里父老云即漢之鮚碕按西漢地里  
志鄞有鮚碕亭顏師古注鮚蚌屬長一寸廣二分  
有小蚌在腹中今縣北皆古鄞地而砂碕中有海

族正如師古之說則父老所記不妄矣或曰鮎碕  
今戰碕未詳

石壘寨

在天台縣北五十里關嶺上壘石為之側有李相公廟  
蓋唐廣德元年王師討袁晁處今遺跡尚存父老  
皆能言之

東西二僊源

東源在黃巖縣東北五里地僊劉奉林主之西源在縣

南嶠嶺九十里地僊張兆期主之見洞天福地記  
七籤

夷州

臨海記云在郡三十里衆夷所居秦始皇遣徐福將童  
男女入海止此洲山頂有越王射的白石又徐堅  
初學記云臨海有夷洲古無銅鐵磨礪青石以作  
弓矢

回浦

在臨海縣東南一百一十九里祥符寺前按後漢志章安本名回浦今即其地也

沸瀆

按臨海記在城南門中有沸水方三尺孫皓時奚熙受

刑於此其後水常沸人疑其冤

按吳志孫皓昏亂窮子何都狀似皓

民間訛言皓死立都臨海太守奚熙聞之舉兵欲誅都都叔父植時為定海督擊殺熙以此觀之殆是為植所擊非受刑也

洗馬潭

在天台國清寺莊之外唐裴甫之亂王師戰於福聖觀  
前今有落馬橋是其處也時以國清建寨此潭與  
馬敬瑄三墩堂皆諸將議事之所又有王軍塘為  
犒軍之所

### 古放生池

在臨海縣之海際陳大建中僧智顗見居民以滬魚為  
業綿亘四百里遂以所得施利賈民田為之事聞  
詔禁採捕國子祭酒徐孝克為之記今廢久矣



赤蘭橋

在縣東南一百二十里舊志云晉成公綏為章安令登橋望江製雲賦焉又見初學記

歇亭

在天台禪林西北一十五里唐孟蘭廉察浙東日捐俸建為游人憇息之地

柔金銅柱

按張勃吳錄及初學記云臨海中有小洲生柔金自北

而南三十里有銅柱西屬國人自稱漢子孫乃漢  
疆場之表

赤城志卷三十九

欽定四庫全書

赤城志卷四十

宋 陳耆卿 撰

辨誤門

魚魯豕亥之訛自昔病之而況山川地理之大乎近之  
為碑刻遠之為載籍紛紜龐雜與麻革俱甚至先後佩  
劍彼此立戰有未易判者余既循其本自釐而正之矣  
他未遑暇也茲卷本出陳維余愛其辯博可据因為裁  
次附焉其間正誤質殊有本有末有從而屬他郡者有

訂而歸吾土者覽者詳之亦足以知談今之易而考古之難也噫於是此書粗詳且備矣

列子載黃帝遊於華胥氏之國在弇州之西台州之

北不知斯齊國

註斯離也齊中也

幾千萬里蓋非舟車足

力之所及神遊而已張湛註云不必使有此國且引淮南子語以為正西曰弇州西北曰台州舊經因之遂謂台之得名其来自古不知以台名州實肇於唐之武德因天台山爾且在東隅亦非西北

列子淮南皆一時寓言無庸援以為據

陸長倩題廣軒詩云為是會稽東郡國不教更號小

蓬萊郡國志永和三年以章安縣東甌鄉為東部

侯國東部元理回浦後屬會稽

回浦鄞地  
會稽越地

元鼎五

年嘗立東部都尉治光武復改回浦曰章安以治

立東侯官通典云東部臨海是也陽朔元年徙治

鄞或有寇害復徙治句章臨海雖東部侯地然則

亦屢徙矣諸說皆云東部惟顏師古注漢地里云

回浦南都都尉治未知孰是

漢書元封元年東越降帝以其反覆遷之江淮間虛其地為治縣顏師古注治縣曰本閩越地注回浦曰南部都尉是也宋志乃引司馬彪曰章安故治地則臨海亦治地乎然治本屬閩故高帝時以無諸都之無諸既都治而搖都東甌自是兩處若置治縣豈於東甌界中又治閩閩去臨海一千二百里若嘗置縣在此則前漢表縣大率方百里安得

一縣如此之遠况治縣改為章安續又分章安南  
為永寧不應永寧介乎其中南北斷為兩境皆名  
治縣雖後漢至吳多指東越之地為東治實稱會  
稽故其治有東治山亦非今臨海也

舊經序云光武時始改回浦為章安置臨海縣屬會  
稽郡按吳少帝太平二年方分置臨海何由光武  
前二百年而置之乎又云吳太平二年分章安立  
羅江按長樂志改章安為羅陽在建安二十三年



而吳太平二年亦但分羅陽等縣屬臨海郡時則  
有羅陽王表見於吳紀非羅江也又云晉太康四  
年以羅江屬晉安郡按長樂志載晉太康三年始  
以侯官為晉安郡領縣八羅江在焉至宋有晉安  
太守領縣五羅江仍與則舊經謂晉太康間羅江  
屬晉安雖得之若言立於吳太平中則當作羅陽  
豈得言羅江哉羅陽今溫之瑞安元隸臨海故房元齡  
晉書地理志臨海郡吳置統縣八無羅江縣

舊經云吳少帝太平二年分章安地置臨海縣又分  
章安地立始平永寧松陽安陽羅江合七縣立臨  
海郡按分章安置永寧在永建四年分二縣地置  
松陽始平在興平四年析永寧立羅陽在吳赤烏  
二年凡置五縣皆不在少帝時今云太平二年方  
立合而為七此蓋不考之過今會稽志但云太平  
二年分章安始平永寧臨海羅陽松陽六縣屬臨  
海郡謂之分則舊經以為立非也然則少帝時所

領止六縣目晉地理志雖云又置臨海郡統縣八  
然改始平曰始豐羅陽曰安固分安固曰橫陽析  
永寧曰寧海實在晉時豈得謂之吳置耶

唐地理志云武德四年置寧海今以晉志考之臨海  
郡所統縣八寧海已居其中安得謂置於武德四  
年也按寧海置縣自晉武平吳王濬以兵徇地請  
以鄞八百戶臨海之地二百戶為之今白嶠是也  
至隋開皇九年平陳廢縣入臨海郡唐武德四年

改郡名台州復置縣今海游是其處七年復廢至  
則天永昌元年復置遷於廣度里則今縣治是也  
故寧海剡自西晉以迄隋唐凡兩廢三遷然後定  
夷考顛末殆是晉武帝剡之唐高祖與則天乃起  
廢者耳唐地理之說非也又寧海令高述作縣學  
頌云濱海之西台阜之東有漢古縣屢遷儒宮寧  
海為縣既方剡於晉武而高以為始於漢又大誤  
矣

黃巖古之永寧縣今考其地曰鄉曰江曰驛曰山

方山

舊曰永寧山

皆名永寧又瑞巖寺住持碑并古碑後序

資福院佛殿碑皆曰台之永寧縣存本名也永寧  
置縣始漢永建四年至吳以孫琳為永寧侯韓晏  
為永寧長蓋此地也今永嘉本古永寧縣分置故  
永嘉志云晉明帝太寧元年分臨海之嶠南永寧  
立永嘉郡孝武寧康二年又分永嘉郡之永寧置  
樂成縣隋開皇九年平陳郡廢改永寧為永嘉縣

隸括州大業初郡復置縣仍屬焉唐武德五年以  
永嘉縣置東嘉州領永嘉永寧等縣貞觀元年州  
廢省永寧隸括州然則永寧蓋嘗屬溫與處矣黃  
巖雖古永寧而古永寧地廣今之永嘉樂成皆其  
地也自晉分臨海嶠南為永嘉地始屬之嶠南今  
之嶠嶺與樂清分界唐上元二年始分臨海縣置  
永寧縣至武后天授元年更名黃巖然則古永寧  
甚廣今之黃巖特上元間分臨海而置耳

天台山賦云濟猶溪而直進落五界而迅征呂向注但云五界峻道名濟此險阻經峻道而疾行也惟李善注此獨云五界五縣之界且授孔靈府會稽記曰此山舊名五縣之餘地謂餘姚句章鄞剡始寧此說是也然登真隱訣謂大小台處五縣中央五縣謂餘姚句章臨海天台剡縣則與善所注微異今兩存之

舊志載張遼為盪寇將軍陳簡梅成叛太祖討之簡

入山中有天柱山遼遂進軍斷簡成首太祖謂功  
曰登山履險遼之功也增封假節按臨海之延恩  
寺後天台之縣西雖皆有天柱山而遼未嘗進兵  
至此舊志果何據而云乎今會稽縣宛委山一名  
天柱臨安亦有天柱山不應便指為台之山也

夏英公為倅日作延慶院記云臨海濟靈江而西越  
萬步至括蒼山與真隱山並間有垂流千仞漱石  
成淵蛟龍宅之按舊志真隱山在臨海縣西南十



五里本名括蒼山又名天鼻唐天寶中改名真隱則括蒼即真隱英公析而為二非也

孫綽天台賦有云蔭牛宿以曜峯託靈越以正基蓋言天台山據越地之靈而正基址爾非專以靈越為台山也江總修心賦曰喜南斗之分次肇東越之靈秘又晏元獻石氏山齋詩云書僊十閣壯儒宮靈越山川寶勢雄以是攷之則會稽本名靈越非止台也

會稽志載天姥山在新昌縣東南五十里東接天台  
華頂峯故李白天姥歌有天姥連天向天橫勢拔  
五嶽連赤城之句然郡國志載天姥山乃在臨海  
郡山嶠與括蒼山相聯或云在越或云在臨海疑  
此山綿亘相延故二處皆有之然臨海記但言此  
山在臨海按舊經運羗山亦名天姥山在僊居縣  
東連括蒼且云石壁有刊字如科斗春月樵者聞  
笳簫之聲與臨海記同則天姥山又僊居之羗羗

山也

真誥曰越有桐柏之金庭今剡縣金庭館乃沈約造  
本觀記云約定居桐柏嶺建館曰金庭則是剡之  
金庭亦號桐柏也今天台縣洞宮以桐柏名始於  
唐景雲二年司馬承禎所置而寧海縣之西南亦  
有桐柏山連天台山故神邕天台山記力辯云從  
極東至寧海界有桐柏山其狀高峻道士司馬承  
禎云瀑布山頂是桐柏山因置觀不知山固在寧

海也又太平寰宇記云在寧海西五十里今其地  
猶有桐柏里是剡縣天台寧海皆有桐柏然道經  
云越有金庭桐柏與四明天台相連真誥又云桐  
柏山在剡臨海二縣之境一頭在會稽東海際其  
一頭入海中然則山之綿亘如此三邑接境宜皆  
指為桐柏也

陶弘景真誥云天台山高一萬八千丈李白夢遊天  
姥歌乃云天台四萬五千丈對此欲倒西南傾疑

不同也又國清寺在縣北十里長松夾道翠綠紫  
紆故賈島送僧歸國清寺詩石澗雙流水山門九  
里松張祜遊台山詩盤松國清道九里天莫覩至  
李白詩乃云天台連四明日入向國清五峯轉月  
色百里行松聲百字合作九字豈傳之訛耶

蓋竹山為洞天福地今婺之東陽溫之樂清台之臨  
海黃巖天台皆有之東陽志云在縣東南三十里  
泗渡澗之南巖有石室三間號為蓋竹福地樂清

志云蓋竹山去縣二三里後山絕頂有巖洞可環  
坐數十人俗名楊八洞七十二福地圖云第二福  
地蓋竹山在台州黃巖縣玉清璇極洞天圖云第  
十九蓋竹洞周回一百八十里在台州黃巖縣而  
天台志云舊傳石梁側有蓋竹洞天何公持節澄  
按嘗夢遊其地後邑宰窮探得之洞深可三丈餘  
中有二峽觀諸志所載不同詳攷是山實在臨海  
縣東三十里

地名長石

故塵外記以為山在臨海有洞

周回八十里僊人陳仲等居之而輿地志亦云臨海郡之章安縣西北有蓋竹山山有石室晉許邁住此以此觀之不在他處明矣

唐守仲友記云山經地志蓋竹山皆

寓台之黃巖今在郡城東南三十里介臨海黃巖間雖謂之在黃巖可也

玉京洞在赤城右脇蓋十大洞天之第六周三百里

見登真隱訣及名山福地記

然會稽志載越之諸暨亦有玉京

洞吳處厚題云秉燭携筇却步前玉京迢遞訪神仙四時自有壺中景一罇都迷物外天洞在天台

不應又在諸暨及考徐靈府小錄云其下別有洞  
臺方二百里南馳縉雲北接四明東距溟渤西通  
剡川台越既接境而洞之廣復如此疑相通也

謝靈運有登臨海嶠初發彊中作與從弟惠連詩五  
臣文選注但云臨海郡名彊中地名其實彊中在  
剡縣非郡境也彊強同音故剡中今稱強口市蓋  
近彊中也強口者去剡一十五里其溪水尤紺澈  
可愛世傳王謝諸人嘗以雪後泛舟至此徘徊不



能去今會稽志已載此詩矣

謝靈運遊赤石進帆海詩揚帆采石華掛席拾海月  
卽其地也是詩已載樂清詩集矣今復載之天台  
集可乎按靈運名山志云永寧安固二縣中路東  
南卽是赤石永寧雖今之黃巖在靈運時已分於  
永嘉而安固又今之瑞安也又按顧野王輿地志  
云樂成縣西北有赤巖山赤水所出道書云具山  
正赤一名燒山又曰赤山正對臨海縣南與永嘉

接石映水通赤有石室從柵溪東北入樂成今溫之樂清也然則所謂赤石者殆不在天台矣

郡倚山瀕海易以捍守自晉唐間嘗經孫恩袁晁裘甫劉杜之擾至本朝宣和復罹睦寇餘孽故五邑聚落往往以城砦營柵屯戍得名如臨海之新城城門黃巖之漢城古城建城莆林城孫恩城寧海之堆城則以城名如天台之始豐寨壽昌松門關嶺等寨則以寨名寧海之柵墟黃巖之柵嶺柵浦

臨海之柵橋柵村則以柵名又如大郭營之在臨

海

其地至今有方將軍廟相傳舊立營於此有上營下營之名

大營前之在寧

海女營之在黃巖

營在栢都有諸大夫廟舊傳晉人嘗攻賊於海島遂血食其地

則以營名黃巖有戍浦村戍浦嶺郡城東十里有屯頭則以屯戍名也

鱗洋在縣東南五里今名下洋乾道之火郡人營造鄉民坎土入城市之下有魚網敗舟之屬疑此地舊嘗為江也宣和間居人有獲壞碑者曰唐龍紀

元年處士李昱葬於鱖洋之濱則知得名久矣

黃巖屏山之南有塢曰晉塢湖曰晉湖山曰晉源相  
傳晉王之裔嘗居此故名按山半有明覺寺寺有  
小碑曰晉王遊適之地則又非其裔矣大抵昔人  
遊行之地後人思之故因而得名不記其始可如  
臨海之招賢洞有晉潭殆亦此類又寧海梁王寺  
梁王墓舊傳為梁王譽而王亦未必至此黃巖有  
塢曰徐塢山曰徐山或云徐偃王之廟或援古建

台州記云地主任氏女感闕精而生男有文在其

手曰徐因號東海闕徐闕長竊據自號徐王死葬

此山其言不經殆未可盡憑也唐

會稽志載司馬悔橋在新昌縣東南四十里

司馬承禎隱天台山被召至此而悔因以為名竊

謂此橋當表而出之以為闕

為悔曰司馬悔

橋闕

七籤載司馬悔山

在台州天台山

關

地李明僊人所治

之處山在天台新昌

關

故橋以山得名有過

容題詩云道書司馬悔福地在天台茲山秀盤古  
億載青崔嵬如何越中志紀載殊未該浪云唐子  
微曾過茲橋來奉詔悔輕出欲勒俗駕回至今名  
字存脩梁架巖隈圖謀已大庆土俗尤疎哉以悔  
為晦名大字標版牌流傳愈訛舛雲笈君試開讀  
此詩可見其槩矣

壁紀載曹弘達天祐十年到任繼之以孫琰天祐十  
四年張從保天祐十七年錢鑑天祐十九年今考  
之唐史天祐乃昭宗末年紀號至哀帝不改舊號  
終於天祐四年而止是年禪位於梁梁改元開平  
凡四年又改乾化凡二年固未嘗有天祐至十九  
年者而壁紀所記如此詳思之唐末錢鏐據有吳  
越唐政既出於梁故錢氏但循唐之紀年不改舊  
號臨海又其所隸故郡守更代亦止用唐正朔故

書天祐至十九年也然通鑑所載則有可疑梁紀載開平初但云是時惟河東鳳翔淮南稱天祐西川稱天復餘皆稱梁正朔又云是年以鎮海鎮東節度使錢鏐為吳越王則錢氏蓋受其封拜用其正朔矣觀壁記所述乃用天祐至十九年而不易其心不忘唐如此哉

魯洵作杜雄墓碑稱雄字昌符京兆人徙台與劉文起事劉知明州因人之欲請主郡政廉使承制加



御史大夫明年兼大司憲轉左貂錫以竹使符詳  
攷其辭則是劉文自使之守郡後方本道界之郡  
符耳又云光啟三年加工部尚書是秋遷刑部尚

書今聖嗣位

蓋昭宗也

嘉其威武謂執政曰寰宇方擾

獨海郡有武不用非以德行化乎因命以德化為  
軍號文德元年加兵部龍紀初加右揆大順初加  
左揆乾寧二年加司空乾寧四年冬十月卒今壁  
記載杜雄中和三年到任至乾寧四年方稱駱園

繼之殆與洵所製碑合攷之唐史紀年則雄在郡  
首尾凡十五載然洵乃雄吏其辭自稱門吏德化  
軍巡官魯洵則誌文未免失實且言語淺俚無足  
觀又一事可疑其云中和三年太守劉公改刺四  
明雄主州事而唐書僖宗紀云光啟二年十二月  
丙午台州刺史杜雄執劉漢宏降於董昌資治通  
鑑中和元年云臨海賊杜雄陷台州光啟元年台  
州刺史杜雄誘漢宏降執送董昌斬之唐書稱執

漢宏事在光啟二年十二月而通鑑稱元年年既不同而五代史九國志所載殆是漢宏因錢鏐為董昌取越州故奔台州雄執之以送昌非漢宏降雄也通鑑少誤

檢校尚書工部郎中前兼台州刺史李師望大中十四年三月十七日準詔領義成武寧兗海宣閏等道兵士一千七百人乘駟赴任討除草賊至其年四月二十三日戰於天台觀前其日收復唐興縣

自此六戰斬首四千級招降九千人至九月方平  
寧咸通三年罷郡九月十一日北歸因留題以上  
皆師望自紀見於桐柏觀元稹碑陰觀其所刻蓋  
捕裘甫時也裘甫衆至三萬有劉晔劉從簡輩頗  
勇焚掠城邑聲振中原王武為浙東觀察使請兵  
以行懿宗詔發忠武義成淮南等道兵授之浙東  
軍連戰不利故師望分統此兵方克奏捷然師望  
所刻作大中十四年而通鑑以為咸通元年蓋懿

宗即位於大中十三年八月改元必在次年遠方  
自稱為十四年雖咸通三年所題仍舊號而史家  
書法只以改元標於即位之始年故也後六年師  
望以鳳翔少尹請分蜀建定邊軍遂為雋州刺史  
台州天慶觀有唐開元真容應見碑蓋開元二十九  
年立也後題朝散大夫使持節臨海郡諸軍事守  
臨海郡太守賈長源及桐柏觀碑天寶元年立則  
作朝請大夫使持節諸軍事守台州刺史上柱國

賈長源此一人耳所載官稱及郡號不同如此蓋  
嘗攷之唐至天寶元年改台州為臨海郡至乾元  
元年復為台州不應開元二十九年便稱臨海郡  
天寶元年却稱台州又唐自武德元年改郡為州  
太守為刺史加號持節後為使持節諸軍事至天  
寶元年復改刺史曰太守亦不應開元二十九年  
已稱臨海郡太守而天寶元年既改作太守復號  
刺史非二碑之誤則史之誤也

舊經以千姓編云蕢雲陶唐時居白鶴觀遂冠之僊  
隱門非也按靈笈七籤女僊傳稱徐僊姑徐之才  
之女咸通初謂剡縣白鶴觀道士蕢雲陶曰我先  
君仕歷周隋以方術聞剡縣即今之嵎縣錢氏以剡字兩  
火一刀不然則蕢雲陶非在台之白鶴觀舊經誤  
矣

曾守幾作遺直堂詩力辯孔文仲為州推官非為司  
戶文仲曾舅也故公序其事云或云孔公應制乃

台州司戶叅軍非推官也幾謂公為舅知公所歷  
無疑試問其說則曰實錄會要云爾幾曰是固書  
之少誤州有公所譔修城記曰從事有天台詩集  
有浮碧軒榜有官文書皆曰推官可覆視也或曰  
安知不嘗為司戶乎曰公之墓誌丞相蘇公之文  
也一命試秘書省校書郎杭州餘杭尉再調南康  
軍司理昇台州軍事推官對制策趣還本任未嘗  
為司戶也



舊傳危樓高百尺手可摘星辰不敢高聲語恐驚天  
上人為揚文公幼時詩邵氏聞見錄又云舒州峯  
頂寺有李太白題云夜宿峯頂寺舉手捫星辰不  
敢高聲語恐驚天上人前二句既不同而其說復  
異今天台華頂峯有孟觀詩云偶因華頂宿擡手  
摘星辰不敢高聲語恐驚天上人蓋華頂一峯天  
台山之最高者故觀詩有此語今峯傍有摘星嶺  
因詩立名則前所指為太白文公語疑好事者改

之爾



赤城志卷四十

今天下郡縣皆有紀錄台獨為闕典問之故府則知前  
乎此者蓋嘗會粹而踈畧未備也碩承乏之初固竊有  
志而事方有所未暇越明年歲以稔告郡家粗可支吾  
於是命郡博姜君延集人士相與討論而屬筆於篋牕  
陳君閱數月而後成書吾州在浙左為佳郡讀孫興公  
一賦則知山川之美實甲東南況自晉唐至今前後曳  
組于此多一時名勝士至于騷人墨客搜奇抉秀皆班  
班可考然則是書之作豈特可以補職方氏之闕雖山

川人物亦將由是而發揚呈露於天壤間其為益於台也深矣嘉定十六年郡守青社齊碩書

成化丁未余始得是志於秘閣中遂手錄以出於是故亞卿林公鶚黃公

闕

皆從余本而翻錄之蓋是志作

於宋嘉定中至是幾三百年其藏之民間者蓋鮮克見念欲因此閣本特存其舊以廣其傳未能也去年秋太守陳公相以郡志屬余重修因訪得東門周氏本未幾拙訥葉先生之孫定中亦以其家所藏者來告蓋皆嘉

定刻本也嘉定後不十年又有所謂續志三志者續志雖存而其所載無大關涉三志則并其本而亡之故今祇取閣本叅二家而校之大抵二家者行款雖無甚異而視閣本則又有不同矣蓋其時所刊者各自有此三本因得彼此互訂以從其是太守公遂取而重刻之與新志並行於是一郡之因革顛末皆可考而見也噫公於吾台之文獻其用心不亦勤矣哉弘治丁巳秋八月八日郡人謝鐸識於方巖書院

